



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma : Tir Yimym

tiryimym@aolima

tir yimym

TAPAK 7

**Raina lenisüba nung India team
Billie Jean King Cup asayatsü**

**Imran Khan-i tir menden atema
Mahmood Khan Achakzai nominate asü**

VOL. XXI ISSUE NO. 140 (ADOK 140) DIMAPUR AMUNGNÜ (SUNDAY) METSÜREMI (MARCH) 03, 2024 ₹ 5.00

TIPRASA Accord nung sign sütepogo

Agartala, March 2, 2024 (Agencies): March 2, 2024 nü Tripura state tarutsü atema kanga dang tongtipang sentong ka agiogo aser ibaji TIPRASA Accord nung sign sütepba lir.

"Iba otsüsütsü tenangzüktep agitettsüsa Pradyot Debbarma-i anir sendaktepa alir ajaki shilem agiba atema tenüngsang agütsür" ta Union Home Minister Amit Shah-i ashi.

"Tesüiba nung aibelentem ajanga tarutsü tajungba akümtsü lenmang lapoktsür. Tanü iba accord ajanga asenoki putiotsü akhümtsübur aser aibelentem metongshir tejakleni aotsü lenmang lapoker" ta pai ashi.

Centre, Tripura sorkar aser Tipra Motha tsungda tripartite agreement ajanga lisopurtemi mapang talangka timtem aruba khurettem aser temetentem asoshi inyaksü mera tasen ka agir.

Iba yimjung maparen nung Tipra Motha, lisopur political party aser teloktemi shilem agiba ajanga takok nguogo, ta Amit Shah-i metetdaksü.

"Prime Minister Narendra Modi lenisüba kübok Northeast nung yimjung aser azükaru bentsür aruogo. Modier sorkar kümsük kübok accords aika nung sign sütepogo aser tanü TIPRASA Accord nung sign asür. Iba ya züngsema Northeast nung yimjung aser terenlok nung rangloker tenangzüktep 11 agiogo" ta paisa ashi.

TIPRASA Accord kübok tripartite committee ka tenteta mapa inyaka aotsü. Tanü accord sign sütepba sentong nung Tripura Chief Minister Manik Saha, Member of Parliament Biplab Deb aser Tripura Chief Secretary nungertem aden.

"Tanü otsüsütsü tenangzüktep nung sign sütego. India sorkari tesüiba nung aibelentem agizükogo aser lisopurtem khurettem koktettsü atema meranger. Sorkari asen oshi, rongsenketzüng, yimtenren taginüba aser sobaliba putiotsü asoshi temulung agütsütsü nangzükogo" ta taoba TIPRA Motha chairman Pradyot Manikya Debbarma-i ashi.

Manipur MLA-i 'shoot at sight' shidanger

Imphal, March 2, 2024 (Agencies): Manipur nung Keirao Assembly Constituency MLA Lourebam Rameshwar Meetei-i Myanmar nungi ozüing alema arurtem dak injang khaloktsütsü tebilemba ka shidangogo.

Myanmar nungi ozüing alema arurtemi voter cards angutsü atema tim masüba inyaker aser lisopurtem den kibong akümer anungji 'shoot at sight' policy alitsüla ta MLA Meetei-i ashi.

Paisa National Register of Citizens (NRC) mapa tenzüktsü aser kanga junga anüktsü nungdakba shiogo.

Ozüing alema arurtem aser ali atsünga agiba noktangsü atema sorkar aser lisopurtemi shilem agitsüla. Ozüing alema arurtem ya national security atema lendong lir anungji ozüing takang ka yanglutsüla, ta MLA Meetei-isa metetdaksü.

Manipur Assembly session nung Meetei-i par constituency

nung ozüing alema arurtem tebilemstü lemsatop.

Mizoram nungi nisungtem Aadhar cards bener arur Manipur nung alir aser parnok voter list nung zülüokogo. Item ozüing alema arurtemi Burma nungi ano ozüing alema arur talila anir aruogo ta Lourebam Rameshwar Meetei-isa ashi.

Imphal West nung lisopur tetsür ka Kuki nung telungpur ka den kibong aküm aser alu aika nguogo. Item ozüing alema arurtem ajanga lisopur aika talidak maka kümogo. Anungji Naga nungeria ozüing alema arurtem aser ali atsünga agiba noktanga nung shilem agitsüla, ta paisa ashi.

Tesüiba sorkari Meitei nung anema mapa inyakang nisung 3600 tashi tepset. Tasürtem rongnung pamok 1500 tashi fake encounters nung khaset. Anungji ozüing alema aruba tebilemstü koktettsü atema 'shoot at sight' policy ka alitsüla, ta MLA Meetei-isa ashi.

Nagaland aser Manipur Police-i drug shibelener 4 apu

Imphal, March 2, 2024 (Agencies): Manipur aser Nagaland police yaritepa drug shibelener maparen ka makdokogo aser iba mapang parnoki nisung 4 apu.

Tesüiba ghonda 48 tsungda police-i tetsür ana dena nisung 4 apu.

Railway Police Station, Dimapur nungi ashiba nung ajemdaker Manipur police-i Manipur kübok Ukhrul district nung drug shibelener ana-Ramesh Bhandari aser Lovejoy KKS na apu.

Ukhrul Superintendent of Police Karthik Malladi-i anir ketdangsürtemi Ukhrul kübok Tasar Farm nung tena apu.

Taoba mapang regional market nung Rs 1.04 crore alang drugs apuba dak sendakba nung Bhandari aser KKS na aputsü bushitepa aru.

Külen March 1 nü Nagaland police-i Dimapur Railway Station platform No 1 nung tetsür ana apu.

Manipur nungi tetsür ana ya South Police Station, Kohima-i anir ogo.

Nagaland sorkari Foothill Road atema temulung agütsür

Sl. No.	Details	Length (KM)	Remarks
1.	Tizit to Tuli	95.00	
2.	Tuli to Dimapur Bypass	205.00	
3.	Dimapur Bypass to NH 29 (4th Mile)	5.00	
4.	NH 29 (4th Mile) to NH 29 (7th Mile) =4.8 km	4.80	National Highway 29
5.	NH 129 A (7th Mile to Jalukie)	45.00	National Highway (NH 129 A)
6.	Jalukie to Athibung	18.00	
7.	Athibung to Khelma	41.00	
	TOTAL	413.80	Including National Highways
	TOTAL	364.00*	Foothill Road length (excluding National Highways)

Note: * the length of the road -364 Km, is subject to minor changes on the basis of technically feasible alignment.

Kohima, March 2, 2024 (TYO): 2014-15 tsungda Dimapur nungi Tizit (Total 300 Km) Length tashi Foothill Road nung formation cutting aser 129.60 Km (single lane road configuration) nung embankment inyakogo.

Nagaland Legislative Assembly budget session nung NPP MLA Nyamnye Konyak-i atema asungdangdang Roads and Bridges Minister G Kaito Aye-i iba telangzüba agütsü.

Foothill Road nung Governors camp anasa RCC Bridge (134.8m) yangluogo ta Minister Aye-i ashi.

"Iba lenmang lapokba ajanga Foothill nung Industrial Zone asangsang akümtsü aser iba ajanga rongsenketzüng maparen tajungba akümtsü. Iba mapatong inyaka aotsü asen medemertem nungi amalitep nungdaker" ta paisa metetdaksü.

"Foothill Road ya Nagaland atema kanga dang tongtipang lir aser Chief Minister-i budget nung Rs 148.50 crore lemkütsüba atema kanga pelar. Iba mapatong ya sangküm tashi nung renemtsüla" ta MLA Nyamnye-i ashi.

"Foothill Road ya tamshirtem atema dang masü saka Nagaland ajanga atema kanga tongtipang lir" ta Chief Minister Neiphiu Rio-ia ashi.

"Sorkar, civil society aser committee temi iba lenmang ya National Highway kumdaksütsü atema kanga meranga inyakdar. Ajsüaka Ministry-i iba lenmang ya National Highway jenjang angutsü atema traffic density matonger ta ashi. Iba jagi Foothill Road mesüra Trans Nagaland Highway ta ajatsü lemtetogo" ta CM Rio-i ashi.

"R&B Minister, technical wing aser arrtsülen nungi MLA tem jaoker mapatong nung

yariteptsü tebilemba lir. Iba mapatong nung nübertemi amalitep alitsüla aser talisa nübertemi ali angati agütsütsüla aser Tizit nungi Dimapur tashi lenmang tajungba kumdaksütsü merangtsüla" ta paisa metetdaksü.

Foothill Road atema mezüngbuba alignment nung Tseminyu district kübok tesem kar dena aliba ama yanglutsüla ta JD(U) MLA Jwenga Seb-i ashidang Chief Minister Rio-ia mapatong tongtiba renemba sülen Foothill Road temeket anasa aliba yimtsüngtem sendakteptsü ta nangzük.

MLA Achumbemo Kikon-ia Rs 148.50 crore amshia National Highway kumdaksütsü tebilemba ka lemsatop.

Budget session nungsa Minister Aye-i Tizit nungi Khelma tashi FHR indang Sector/Division wise details agütsü.

NDPP-i Lok Sabha election candidate atema Dr. Chumben Murry shim



Dimapur, March 2, 2024 (TYO): 2024 Lok Sabha elections atema Nationalist Democratic Progressive Party (NDPP)-i Dr. Chumben Murry shim aser pa ya People's Democratic Alliance (PDA) consensus candidate asütsü.

Honibarnü Kohima nung NDPP Parliamentary Board senden amenba sülen iba osang metetdaksü.

NDPP Parliamentary Board convenor aser Chief Minister Neiphiu Rio o NDPP president Chingwang Konyak na lenisüba kübok Parliamentary Board

senden amendang PDA consensus candidate ama Dr. Chumben Murry nem ticket agütsütsü bangjemtep.

Dr. Chumben Murry ya taoba MLA ka lir aser pai yimtenren mapa nung shilem agia aruogo.

Tanü NDPP-i sangdong ka nung PDA consensus candidate pusema nungittsü ayongzükogo.

Dr. Chumben-i 38 Wokha Assembly Constituency nungi kümsük anaben tashi MLA inyakogo.

Pai Congress nungi NPF züngsem aküm aser iba sülen NDPP nung aden. 2023 state

Assembly election nungbo pai metoktep.

NDPP Parliamentary Board-isa Nagaland sorkari terenlok mapa balala inyakba aser Chief Minister-i mangdang aketba budget sayaba atema tenüngsang agütsü.

Parnokisa PM Narendra Modi, Home Minister Amit Shah aser BJP President J.P. Nadda nungeri yariba atema pelaba metetdaksü.

Iba ajanga state aser central lennirtem tsungda tesentaktep tajung aliba sayur ta NDPP Parliamentary Board-isa metetdaksü.

9th NAP (IR) Battalion amenoker kum 25 ajungba anogomung mungogo



Dimapur, Metsüremi/March 2 (TYO): 9th NAP (IR) Battalion 1999 kum amenoker kum 25 ajungba anogomung March 1 nü kanga meraketa mungogo. Iba sentong nung Additional Director General of Police (Law & Order), Nagaland Sandeep Tamgadge, IPS tongti tesemdang liasü.

Iba sentong ya tongti tesemdang, officer aser asür kinungertemi Memorial Park nung naro toktsüba sentong agia tenzüka liasü. Iba sülen tawa yangluba Jubilee Park lapoktsü, kong tang aser taoba mapang Battalion züngsemtem atema bendanga agütsüba amphitheatre ka densema lir.

Iba sentong nung taoba mapang Commandant, officer aser asür kinungertem aser tang Unit züngsemtemi shilem agia liasü.

Sentong ya Dy. Commandant Shri Shouka Kakheto lenisüba nung agi,

kong Unit Pastor Rev. Rukuevei Nienu-i bendanga agütsü sarasadem ayongzüka agi aser Commandant Shri V. Alo John-i lokti pela agizükba o jembia liasü.

Maneni sentong nungsa asürtem nem tetushi agütsüba mapang agi aser iba sülen Jubilee Memento aser nungu kaket saya liasü, kong Battalion puti otsü aser takoktem shisema lir.

Alakteta jaoker Unit indang Raising Commandant L. Bendang Lemtur, IPS (Retd)-i Battalion tenzüka mapang tetsükdaktsü balala ajangshibatem indang lemsatsep aser iba battalion maneni tejakdangi bener aotsü ajungshi. Ano sentong nung o jembirtemi parnok tajangshibatem lemsatsep aser training, operation mapang otsü balala aser timtem tekangshi ajangshibatem indang lemsatapa liasü.

Tongti tejaoker Sandeep

Tamgadge IPS-i, Battalion koda tongtibang iba indang lemsatsepba den left-wing extremism tem samatsüba talisa Chhattisgarh nung Battalion-i tongtibang shilem agiba indang lemsatsepba tenüngsang agütsü. Paisa, iba Battalion ya tanungba IR Units tem atema nükrangdong ka lir ta ashi.

Kasa mapang nung L. Bendang Lemtur, IPS (Retd)-i, taoba kum 25 tsungda Commandants tem parnok mapa tajung bilemtetsü asoshi yangluba Jubilee Morung semzüka liasü.

Sentong nungsa Unit indang naklo ken saya aser lokti chiyongba mapa liasü. Dy. Commandant Kilemtoshi Jamir-i tepela o jembiba sülen formal sentong tembanga liasü.

Maneni nikongtsütsü Musical Extravaganza sentong ka ayongzüka agi, kong Mahila Band comedian Michael Ketz nungeri shilem agia liasü.

67buba Nagaland Village Guard Raising Day mungogo



67buba Nagaland Village Guard Raising Day VG Museum cum Memorial Hall Pangsha nung mungogo.

Dimapur, Metsüremi/March 2 (TYO): 67buba Nagaland Village Guard Raising Day March 1 nü Noklak district kübok VG Museum cum Memorial Hall, Pangsha nung agiogo. Iba sentong ya 'the guardian of the frontier villages' omen nung ajemdaker agia liasü.

Sentong nung alakteta jaoker ama o jembiba mapang Deputy Commissioner & Ex-Officio Commandant, NVG, Noklak Arikumba-i, iba tesem nung yimtsüngtem nung temzüng ozüng shitak benoka inyaksangshitsü atema district administration den longjemer Nagaland Village Guard temi

tongtibang shilem agir, ta ashi.

Yimtsüng nung loktiliba anema inyaksangshiba azüoktsü atema VG temi anibelem mesasai inyaka arudar, ta pai ashi. Village Guard ya yimdaklirtem taküm aser parnok kiojentem kumzüka toktsütsü atema amenokba lir, ta shia DC-i, parnok dang yimtsüng renloka aotsü atema takok tashi yimjung aser tesunep nung toktsütsü mepeshia liasü.

Maneni sentong nung o tatsüka jembiba mapang Commandant NVG, Tuensang Mongkoyanchu-i, 1957 kum Pangsha yimtsüng nung Village Guard koda amenok iba indang lemsatsepba den Village Guards

tem dang parnok mapa bendanga agüja nendaka inyaktü ajungshia liasü.

Sentong nungsa Dy. Commandant, NVG, Kiphire Wanmei Konyak-i, Village Guards temi koda yimtsüngtem kumzüka ayur aser yimjung aser security meraksadaktsütsü atema district administration nem koda teyari agütsür, iba indang lemsatsep. Sentong nung VG mezünpur rongnung Yanthong nem tetushi agüja liasü.

Iba sentong ya Asst. Commandant, NVG Tobu lenisüba nung agi aser Asst. Commandant, NVG, Noklak, Nokchem L-i tepela o jembia liasü.

Longleng nung District Level Neighbourhood Youth Parliament agiogo

Dimapur, Metsüremi/March 2 (TYO): Nehru Yuva Kendra, Longleng aser Longleng District Administration na longjemer March 2 nü CMTC Hall Longleng nung District Level Neighbourhood Youth Parliament sentong ayongzüka agiogo. Iba sentong nung EAC, Vitolu alakteta jaoker liasü.

Sentong nung o jembiba mapang alakteta jaoker Longleng EAC Vitolu-i, yimayimpong azüoka alitsü aser mapang shitak amshitsü koda tongtibang iba indang lemsatsepba den sabang ajak nung takok tashi shilem agitsü ajungshia liasü.

'New India, New initiative' onük nung ajemdaker jembiba mapang Dr. Samuel Akho Konyak P, EAC Longleng-i, youth club tem nem internet amshiyim tasen indang metetdaksü aser loktiliba

balala nung shilem agitsü ajungshia liasü.

Sentong nung DYO, NYK Longleng Kisor Barman-i, okila jembiba mapang tejaoker aser sentong nung shilem agirtem pelashishia agizük aser Mybharat portal nung koda züngksemtsü iba indang tangazükba agütsü.

Kasa mapang nung Longleng district kübok Youth club 14 nem asaya dang amshiba oset balala lemstü aser Election Department Longleng-i EVM amshiyim sayua liasü. Iba sentong nung shilem agirtem ajaki VVPAT machine amshiyim sayuba aser vote agütsüba yimya sayuba nung shilem agia liasü.

Iba sentong ya Mongnyei C. Phom, NYV lenisüba nung agi aser Pongchei B. Phom, NYV-i tepela o jembir tembanga liasü.

NSSB mendenbubai asükhu lemsatsep



NSSB, mendenbuba, Sedevikho Khro-i o jembiba mapang tangokba noksa nung angur.

Dimapur, Metsüremi/March 2 (TYO): NSSB züngsem asür Er. Ghukhui Zhimomi den asüpila sentong March 2 nü Diphupar B Relkamenon nung pa kidang agiogo.

Asüpila sentong nung o jembiba mapang NSSB mendenbuba Sedevikho Khro-i, asür Er. Ghukhui Zhimom'er kinungertem den asükhu lemsatapa liasü.

O jembiba mapang NSSB mendenbubai, 2020 kum Nagaland Staff Selection Board amenokba mapang iba lokti tentet takok ngua merekmeraka bener aotsü atema nisung tapet ka nungdaka liasü, ta ashi. Pa ya NSSB founding Members rongnung ka ama 2021 kum February 14 nü shim aser February 18 nü nungi mapa agizüka inyaka liasü, ta pai ashi.

Iba den bendenloksema 2022 kum mezünpur NSSB tatidang takok ngua agiba mapang Zhimomi-i teyari tulu agütsüogoo, koba Nagaland nung tatidang tulutiba rongnung ka liasü, kong district 11 kübok examination centre 111 nung candidate 50,000 dak tema

tatidang agüja liasü. Asür Ghukhui Zhimomi-i NSSB tentetba aser inyakyim nung masü tashi shilem agiogo. Pai, inyakyim ajak shitak inyaktü atema nokdak, khuret aben aser tia tensa ajak nung pa den inyakertem nongita aruogo, ta Khro-i ashi.

Maneni NSSB mendenbubaisa, Er. Ghukhui Zhimomi ya irrigation and Flood Control Department nung Engineer ka liasü aser lokti asoshi bendanga agüja inyaktü atema pai 2011 kum December ita 19 nü voluntary retirement agia liasü. February 29 nü pa asüba ya tesasatsüka aser adianu, medemer, lensayur aser tongshi takangka samaogo, ta ashi.

Sedevikho Khro-i, mangyim jashi tia nung aliba mapang asür kinungertem den asükhu lemsatsep aser molungzürep tia nung aliba mapang tulusang Tsüngremi parnok nem anisüngzüak aser tashi agütsütsü sarasademja ataba den asür tanüla teti tatem makadak anisüngzükdakjang ta sarasademja ataba lemsatapa liasü.



March 02, 2024 nü West Bengal kübok Nadia district nung Ato kilonser Narendra Modi-i terenlok project balala semzüksüdüang tangokba noksa nung angur.

Kobi melii EC-i Lok Sabha election agitsü anogotem sangdongtsü

New Delhi, Metsüremi/ March 02 (Agencies): Election Commission of India (ECI)-i Lok Sabha election agitsü atema anogotem kobi melii sangdongtsü, ta Honibarnü Jammu & Kashmir chief electoral officer, PK Pole-i metetdaksü.

Election ketdangsertemi state balala nung Lok Sabha election agitsü atema terenemshiba jenjang asadangdar aser state balala nung chief electoral officers ajurua taruba general elections atema tongtibang onüktem nung o lemtepdar.

Anantnag parliamentary

constituency nung election atema terenemshiba jenjang asadangba sülen osangbenertem den jembidang J&K CEO, PK Pole-i, "Taruba anogo 15-20 tsüingda Election Commission of India-i Lok Sabha elections agitsü atema anogotem sangdongtsü. Ni tesem asem- Anantnag, Kulgam aser Shopian nung district commissioners ajurua jembioigo. Onoki election teladak süa tajungtiba nung aginer aser tesüiba kümtem ama masü tangbo nüburttem teimtiba nem vote agütsüdaktsüner," ta metetdaksü.

"Security tensa dak sendakba nung onoki election mapang nung nüngdakba security forces lezmüksütsü atema telemteba agiogo," ta paisa metetdaksü.

Taruba Lok Sabha election nung vote agütsütsü temsüa alir India nung crore 97 jungnüa lir. February tetenzüklen Special Summary Revision 2024 tembangogo aser India tesem ajaklen electoral rolls asadangogo.

Lok Sabha election dak alia taküm Andhra Pradesh, Odisha, Sikkim aser Arunachal Pradesh state tem nunga assembly election agitsü.

India-i linük nung kanga sensak tia agienogo

New Delhi, Metsüremi/ March 02 (Agencies): India-i official süa linük nung 'kanga sensak tia' agienogo, ta tawa Centre-i sayaba data ka nung ajemdaker US nung aliba think tank Brookings indang report ka ajanga metetdaksü.

"Yimtsüngtem nung sensak tia shilem 2.5 lir aser yimti/jilatem nung sensak tia shilem 1 tashi aluogo. 2011-12 nung 2011 PPP\$ 1.9 poverty line atema Headcount Poverty Ratio (HCR) shilem 12.2 aliba nungi 2022-23 küm tashi nungbo shilem 2 dang kümogo; ibaji küm shia 0.93 percentage points (ppt) lir," ta report nung shia lir.

World Poverty Clock-ia report ka ajanga, India nung sensak tia shilem 2 shi dang lir aser kanga sensak tia nung alir

nütsüng crore 3.4 shi dang lir, ta metetdaksü.

Tawa Niti Aayog CEO, B V R Subrahmanyam-i, India nung sensak tia shilem 5 shi dang alitsüa mesüra iba dang nungjagi ishiba asütsü, ta metetdaksü.

SBI-ia, tang India nung sensak tia shilem 4.5 nungi 5 dang asütsü, ta shiogo.

Yimtsüngtem nung kibongtemi sen indokba dak sendakba data ajanga ashiba agi, 2011-12 küm yimtsüngtem nung ita shia per capita ji sen 1,430 liasü saka shilem 164 agi teimba küma 2022-23 tashi nungbo sen 3,773 kümogo. Jila/yimtittem nunga ita shia per capita ji 2011-12 küm sen 2,630 aliba nungi shilem 146 agi teimba küma 2022-23 tashi nungbo sen 6,459

kümogo.

India nung chiyungtsü nung sen teindokba tajemba akümer saka osettsüset aser tang nüngdak nung sen teindokbabo teimba dang kümogo.

Survey ajanga ashiba agi, yimtsüngtem nung ita shia chiyungtsü nung sen teindokbaji, 2011-12 nung shilem 53 liasü saka 2022-23 tashi nungbo teindokbaji shilem 46.4 dang kümogo, ajisüaka chiyungtsü masüba items nung indokbabo shilem 47 aliba nungi tangbo shilem 54 kümogo. Iba denji kasa jila/yimtittem nung chiyungtsü nung shilem 43 indoka aliba tangbo shilem 39.2 dang indoker aser chiyungtsü masüba tanga items nung shilem 57.4 indoka aliba nungi tangbo shilem 60.8 indoker.

2008 küm Mumbai amaktsü atema asalentong yanglur tongti süogo

New Delhi, March 02 (Agencies): Kiralongrar telok Lashkar-e-Taiba (LeT) nung senior commander aser 2008 küm November ita nung Mumbai amaktsü atema asalentong yanglur tongti, Azam Cheema Pakistan nung lia süogo, ta intelligence osang ka ajanga metetdaksü.

Pakistan kübok Faisalabad yimti nung pa temelungjang tashidak agi asü; pa arrshi küm 71 liasü.

2006 küm July ita nung Mumbai nung bomb amshia train amakba ken o nunga tongti asalentong yanglurji Azam Cheema sa liasü; iba lendong nungji nisung 188 asüba den nisung 800 dak atema yirua liasü.

2008 küm kiralongratsü atema kiralongrartem nem training agütsüba atema US sorkaria pa bushia liasü. Kiralongrartem Mumbai amakba mapang nungji America nungera nisung trok asü.

Azam Cheema asüpila sentongji Faisalabad kübok Malkhanwala nung agiogo.

2008 küm November 26 nü Pakistan nung kiralongrar 10



tzüyim ajanga south Mumbai tonga aruba sülen parnoki Taj Mahal Palace Hotel densema tesem aika amakdang nisung 116 asüba den security sepaitema 18 asü.

Tesüiba ita ishika tsüingda LeT kiralongrar aika tepsetogo aser iba dak sendakba nung Pakistan-i India nung agencies nem tai tongloksür. Ajisüaka India-ibo 'kiralongrartem tepsettsü atema onoki list meyanglur' ta shiogo.

India-i, "Kiralongrartem tepsettsü atema India-i 'list' yanglu ka asünunga temaba jenjang nungji Cheema lila aser tanabuba-tasembuba jenjang nung JUD tongti Hafiz Saeed aser JeM tongti Maulana Masood Azhar na lila," ta metetdaksü.

Jharkhand state nung Spain tsür ka tashiyim amshia raksatsü

New Delhi, March 02 (Agencies): Jharkhand state kübok Dumka district nung raliwalir Spain tsür ka tebur kari tashiyim amshia raksatsüba sülen police-i melung melemini nisung asem pua lir, ta Honibarnü police-i metetdaksü.

Hokolbar aonung Dumka district kübok Kurumahat nung Spain nung apuani ana ayiptsü atema süki ka renema liasü, ajisüaka tia maka kinüngtsüji tebur kari tashiyim amshia raksatsü. Tenaji motorbike ka nung Bangladesh nungi aru aser Bihar ajanga Nepal-i aotsü tebilemba liasü.

Honibarnü Jarmundi Sub Divisional Police Officer, Santosh Kumar-i, iba tatalokba dak sendakba nung nisung asem puogo aser tesülen osang tejangja metetdaksütsü, ta metetdaksü.

Osang angazükba agi, Spain tsür ka tashiyim amshia raksatsüba nungji iba tesem nungji alir tebur 7-8 shi densema lir aser tang tashi nung melung melemini nisung asem pua lir. Tanüngba nisungtemjia tang tebushidak.

Spain tsür laji tang hospital ka nung medical treatment agidar. State Health Minister, Banna Gupta-i özüng kübok aibelenertem nem temerenshi tulu agütsütsü, ta metetdaksü.

Jharkhand BJP Tir, Babulal Marandi-i, item ama tatalokbatem ajanga region nung tourism jenjang mejungi

akümtsü, kechiyong Jharkhand nung item ama tatalokba bulua kümra shibaibo state semdangnüsü, ta ashi.

BJP MLA, Anant Ojha-i, item ama tatalokba ajanga state tenüng menüksür, aser iba ya state nung tensa tamajungba akümba temaitsü lir, ta ashiba den külemi tekaraba nung aibelneritem ajak aputsü takhangba agütsü.

Hokolbarnü Ato kilonser Narendra Modi-i Jharkhand semdangba mapang state nung tensa tamajungba akümba atema tebilemtsü lemsatepba anogo nungsa bendangtsür ka tashiyim amshia raksatsüogo.

SPACE WANTED For Commercial Lease

HDFC Bank, one of India's Largest Private Sector Bank is committed to reaching financial products and services to people in remote areas of India.

Space for Rural Branches in Assam & Nagaland

- Carpet Area: Approx. 500 Sq.ft
- Ground Floor
- Rcc Structure Building.
- Lease Agreement will be for 15 years initially
- Rent will paid as per actual carpet area

Space Requirement for Bank Branches in these Locations

1. Birsing Pt.I, South Salmara Mancachar, South Salmara, Assam. 281455
2. Namchang Chah Bagicha, Dibrugarh, Naharkatiya, Assam. 292392
3. Derby T.E.,Katigora, Cachar, Assam. 299333
4. Wanching, Wakching, Mon, Nagaland. 267028

For more details please contact: +91-9435025778



March 02, 2024 nü Bengaluru nung Karnataka Chief Minister, Siddaramaiah-i Rameshwaram Cafe nung bomb apokba lendong nung yirur ka semdangba mapang tangokba noksa nung angur. Hokolbar nikongdang bomb apokba lendong nungji nisung 9 yirua liasü.



TIR YIMYIM YIMOBILEM (EDITORIAL)

DIMAPUR AMUNGNÜ, MARCH (METSÜREMI) 03, 2024

Tsüngrem medeni takok anguba

Alima nung nisungtemi anguba takok ajak ya Tsüngrem nungibo masü. Aji oda, Sayutsüngir tapu 8 tekong 14 nung yamai ashir, "oda temeshipur nisung dak tamajung inyaker dak ama ataloker aser ano nisung tamajunger dak temeshi pur dak ataloker ama ataloker." Tetezü alima nung asenoki temeshipurtema ta bilemba purtem kanga timtema angur saka nisung tamajung shirnoki nisung tepseter, auyar aser rakzükratemer parnokjiang temeshi pur nem moatsür ama jangratema azükarua aliba angur. Aji oda, asenoki aseni inyakba aser aginüba mapatem nung Tsüngrem dang nungi takok aser tajangzükjiang tuluba kümdaktsüra, atangji takok angutsü aser tajangzüka alitsü. Ajisüaka, item takok aser tajangzüktemji Tsüngrem maden anguba takoktem asütsü. Nisung asoshi shitak mesükba lenmang ka lir saka tatembangji tasüba ta asüba temoatsü aser takoktemji itemji asütsüa akok. Iba jagi kasa Sayutsüngir tapu nung ashir, "oda Tsüngrem tsübuba pur shiri Pa dang tsübur, parnok jungküm saka tamajunger asoshi asaktsü." Ibaji alima nung Tsüngrem tsüburtem asoshi anisüngzük o aser Tsüngrem metsüburtem atema tekümdangtsü o asütsü. Atangji, tanü asen lima nung nisung aika tiyazü jembia pei mapa nung takok angur, rakzükratema takar akümer aser tashiyim agi yimten mapa nung takok angur. Item takok ajakji asenoki Tsüngremi moatsüba takoka ta bilemer, anungji tamajung mapa inyaker takok anguba takoktem ajak asoshi asenoki Tsüngrem nem tenüngsang agütsür. Nisung kar tepseter mesüra yirutsür takok anguba, nisung kar temulung jashidaktsür takar akümba, ochimashi mapa kar ajanga takok angubatem asoshi Tsüngrem nem tenüngsang agüja sarasadembaji Pai agizüktsü asü? Tsüngrem medeni takok anguba nung lendong lir ta meteterem alima tanishirtem rongnung Mosa-a ka liasü. Anungji, Tsüngremi kodang Pa dang Egypt lima nungi Israel nungertem aniteta anir aotsü nungloktsü, Mosai Tsüngrem dang ashi, " item nübortem anir oang ta nai kü dang ashir, ajisüaka kü den shiba yoktsü ajibo nai kü dang mashir.... nü tatenba onok den marura, onok yang nungi anir touma." Anitet 33:12 & 15." Kibubai langzü, "Kü tatenba nü den aotsü," Anitet 33:14. Asen den Tsüngrem lir ta züngzunga meteter inyakba aser takok angubaji jangratemtsüka lir. Tanü asenok anema alitsüa akok mesüra mapa ajak nung takok aser tajangzüka ngua alitsü akok, ajisüaka item takok aser tajangzüktemji Tsüngrem adenba agi anguba masütsüa akok. Aji oda, asenok dangi aruba temoatsütemji kong nungi aruar, itemji jangjatsübaji kanga tongtibang lir. Ashiko, nai Tsüngrem masü saka rongsen arishiba agi tajangzük anguba asütsüa akok mesüra Tsüngremi mulungba masü saka nai mulungbalen alima konang bushiba agi takok angusütsüa akok. Ajisüaka, Mosai ashiba ama, asen jakdang aser asen meketa aliba tsükchirtem madak takok nguyonga oaka mesüra mamatzü aser ninang mojitzü talubosa alidak Kanan lima tashiji tonga oaka, Tsüngrem tatenba medenra amajok ta asenoki metettsübaji kanga tongtibang lir. Tsüngrem medeni anguba takokji takok masü, ibaji asen tenük agi ngua alima tsüngdang samatsüba mapatem lir. Tanü asenoki nisung tamajungertem aika rongsen aser alima yimten tashi madak jangratema aliba angutsü, ajisüaka Tsüngrem medeni anguba rongsen aser tajangzüktem jagi asenok dangi memenui teraksa aser tebilemstü khuret tulu bener arutsü. Atangji, takok aser temoatsü ajakji Kibuba nungi arur, anungji asenoki Pa dang meshir. Aji oda, tanü asen akaba rongsen, takok aser maongka ajak ya shitakba Tsüngremi agütsüba temoatsü asü masü ta reprangdangtsübaji kanga tongtibang asütsü. Asen kidang Tsüngremi memulungba rongsen ayuba agi aser Tsüngremi memulungba tashi amshiba agi tarutsü senmangertem kangshidaktsütsü agibo, tanü Tsüngremi mulungba inyakba temoatsü agi tarutsü senmangertem anisüngzüka lidaktsü tajungba asütsü.

OLEMSABANG

Nisung mulong atangtsü aser tansütsü olong kar

~ L.Kika Pongener.

1. Tsüraburji tanabuba Tsüngrem lir, anungji tsürabur dang akümtsübuttsüla, meimtsüla, anepalua benshitsüla.
2. Shirnoki tsürabur aküm-metsübur, memeimer, pei jala-jabaso-ia parnok aküm-metsübuttsü aser memeimtsü.
3. Shirnoki tsürabur, akümtsübur, peladaktsür, anepalur, parnok arishia alitsü, azükarotsü aser temoatsü alitsü.
4. Shirnoki tangar dak azüker parnok daka tangari azüktsü, shirnoki tangar tepseter parnoka tangari tepsettsü.
5. Shirnoki tangar jenjang junga aliba raksatsür, parnok jenjang junga alibaa raksatsüsa mapangi bener arutsü.
6. Shirnoki tangar mena aliba menden atsüngdoker amener, parnok amenba menden-a tangari atsüngtoktsü.
7. Sensaker agi takar akümtsübo kanga-sa tasak, saka takar agi sensaker akümtsübo kanga-sa mela-melar.
8. Shirnoki tangar kibong raksatsür, balaluladaktsür, parnok kibonga tangari raksatsütsü, balaluladaktsütsü.
9. Shirnoki shia meteter ta sur o tali-tapong jembir, parnok chirnur/semchi-semnur tashir-tawar madoktsü.
10. Shirnoki nutsüng nubu dak temulung ulur tangar arioktsür, kenu kijasor akümtsü aser tangari arioktsütsü.
11. Shirnoki rongsen aser tashi lir ta ser tain mazü ainer, kenubo tangar küpok alitsüsa mapangi bener arutsü.
12. Shirnoki tashiyim agi tangar akoker, kenu parnoka tashiyim agi akoktsüsa tensa mapangi bentsür arutsü.
13. Shirnoki ajemalua tila küma tangar akümtsübur, parnok küpoka tangari alitsü aser tangari akümtsübuttsü.
14. Shinga-ia shinga ila-a mebilemstüla, kechiyong na akabaji pa makatsü akok, pa akabaji na makatsü akok.
15. Shinga-ia shinga mezüngmeshi masütsüla, kechiyong nisung shiai pei yari angateta shia- meteta dang lir.
16. Asen nem kechi sempet lemsüktsü ibaji tamshi shia amshitsüla, saka tangar sempet tenuk memereimtsüla.
17. Antsü kanga tesola, talila chira teret chitettsü, ninang mochitsü kanga tanang, saka talila chira araktsü.
18. Nisungi nisung kanga tali masangtsüla, kechiyong kanga tali sangra, pa/laji Tsüngrem den küsa kümstür.
19. Lennir ka asoshi sempet tamajungtibaji, tejak reprangba, tultur-tilar, takar-sensaker bendangba ya asütsü.
20. Lennir ka dak ni, ozü, ozü kidong, Ozü yimer, ozü tzükong, ozü kin...ta asüba shisatsü kheni malitsüla.
21. Tensa tajung nungpo loktiji kari danga anir otettsü, saka tensa majungdangpo nubu ayak tabensa alitsüla.
22. Lennir ajaki lokti nung tenzük dang pei nuja/pei kibong takoksa aremstüla, saka lokti ajangzükdaktsütsüla.
23. Lennir kati pei amenba menden meraketa wazüka ayutsüla, kari meytetra pa/la-ji lennir tajung ka masü.
24. Lennir kati pei-i tenzükba lokti kümsüka ayutsüla, kari raksatsü merangra, pala-ji lennir tajung ka masü.
25. Aibelena inyaka yur Tsüngrem tenung ademer azüngashi masütsüla, ibaji pei sasa pei atakademmer asütsü.
26. Tenzüker-a suang, züngsem ka danga suang, shibai Khristar arogo timtemdaktsür, pa/la-po aiatai asütsü.
27. Shirnok dak shisatsü tajung mali, parnok jagi tangar dak tajung majitettsü, tamajung dang reprangtettsü.
28. Mapa tajung nung kati ka nem tenüngsang agutsütsüla, ibajagi tesentaktep aser telongjem tali akangshir.
29. Mazüng memeteter, mashi-malo nisung kati pei sasa kanga ulua bilemer aser tangar dang aküm-metsübur
30. Tashitemeteri pei sasa tila küma ajemalur aser nisung ajak den kúsasa liteter aser tangar dang akümtsübur.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger agateta agitsü mepishir

Pakistan nung Khristan adianu ana jail nungi chiokogo



Pakistan kübok Jaranwala nung Muslim nunger longkak aiter temi Tenla ki ka rongdoktsü dang tangokba noksa nung angur.

March 02, 2024: Yaküm August ita nung Pakistan kübok Jaranwala nung Khristan adianu anati Muslim nunger temeshi kaket Quran raksatsü, ta tai tonglokja Muslim nungertemi longkak aitdang Tenla ki 20 dak tema rongdoktsüba den külemi Khristan meyong ki aika rongdokja liasü.

Iba tatalokba sülen longkak aiter 130 den Khristan adianu anaji apu saka tawa tenaprongla chiokogo.

Khristan adianu ana- Raja Umar aser Rocky Masih nati Quran mezüngmeshiba ajanga Tsüngrem atalaogo, ta tena nem tai tonglokja liasü.

Ibaji anema Faisalabad

district nung aliba mosque ka nungi dokantem shibangtsü sangoktsüba sülen Muslim nunger lokti jagi Basti Maharawala kiyong maaka liasü.

Muslim nunger lokti jagi Presbyterian Tenla kitem, Catholic Arogo Tenla kitem, Full Gospel Assembly Church Tenla ki ka aser Salvation Army Tenla ki densema Tenla ki aika rongdokja liasü.

March 1, 2024 nü osangbener den jembidang adianu ana atema ken o jembitsür, Tahir Bashir-i, anti-terror court kati tena anema ken o angadangtsü memelungba sülen tenaprongla chiokogo, ta metetdaksü.

Bashir-isa, "Ken o mangadang nungbo melung melemi pua alirtem mapang telatet kecha makai pua ayutsü makok," ta metetdaksü.

"Tenaprongla chiokogo aser tang tenaprongla par kibong den lir," ta paisa metetdaksü.

Pakistan nung nütsüng shilem 2 shi dang Khristantem lir. Iba linük nung Khristantembo 'second class' sensotem ama züngshir aser Tsüngrem mezüngmeshiba ozüng kübok Khristantem nem tai tonglokja apur.

Pakistan nung Tsüngrem mezüngmeshiba ozüng kübok tai tonglokja yimtenren lenirtem, lawyers aser kaketshirtema aika tepsetogo.

Reshikangshi ajanga Khristantem aikati Iraq toktsür aoer

March 02, 2024: Iraq nung küm aika yimtenren tashi maitba aser reshikangshi ajanga Khristantemi maneni iba linük toktsür aoer, aser ano aikati toktsür aotsü, ta Khristan lenir kati metetdaksü.

Cardinal, Louis Sako-i Iraq nung Chaldean Arogo indang website ajanga, linük nung yimtenren tashi maitba aser Khristantem kasa senso ama mezüngshiba ajanga Khristantem aikati iba linük toktsür aoer, ta metetdaksü.

Iraq nung Khristan denomination tulutiba nung lenir, Sako-i, 2003 küm nungi tenzüka nisung melen sen akhangtsü atema Khristantem puer aser tepseter, ta ashi.

Islamic State telok merenba mapang nung Mosul aser Nineveh Plains nungi Khristantem aika jenshia liasü. 2017 küm Iraq nung ISIS maakdoka liasü saka tang tashi IS teloki Khristantem kangshia Islam yimsü dangi

meyipdaksür.

Sako-isa, Iraq nung Khristantemi mapa maongka mangur, itasen magütsür aser Khristantem meyong kiojen rakzüka agir, ta metetdaksü.

2003 küm tashi nungbo Iraq nung Khristan nütsüng lakh 8 shi liasü saka tanübo iba linük nung Khristan nütsüng 1,53,000 dang kümogo.

Cardinal Sako-i, tawa Khristan kibong noklang ka dak temai Nineveh Plains kübok Qaraqosh yimti toktsür ogo, yamaji Kurdistan Region kübok Ankawa yimti densema Khristantemi yimti aika toktsür ogo, ta metetdaksü.

Khristantemi tarutsü tia atema tsübuba aser sorkari Khristantem nem ita aika itasen magütsüba agi Khristantem aikati iba linük toktsür aoer, ta pai metetdaksü.

"Sorkari Khristantem nem ochi temeden agütsütsü atema bilema mali. Parnoki o tajung aika jembir saka mapa agibo inyaka mesayur. Khristan million 1 dak

temai linük toktsür ogo," ta paisa metetdaksü.

Iraq nung Open Doors telok atema inyaker kati, "Iraq nung Khristan kibong aikati parnok atema tarutsü tia tajung mangur, ibayongji bendanglen ang tarutsü jenjang yangertsü atema parnoki linük toktsür oner," ta metetdaksü.

"Küm aika raraba aser kiralongrartemi reshikangshiba mapang nung kibong aika aiben jenshia liasü, aser tangbo parnoki bendanglen ang jenoka liner," ta paisa metetdaksü.

"Nineveh Plain nung Khristantemi Shia Muslim nungertem kanga tsübur. Shia Muslim nungertemi t a n e m - t a n e m i Khristantem meyong kiojentem agiadoker. Khristantem dak tamajung aika ataloker, anungji Iraq nung Khristantem atema tarutsü teimla mali, ta Khristantemi bilemer," ta Open Doors nung i n y a k s a n g i s a metetdaksü.

ANOGO ABEN TSÜNGREM DEN

TATEM MAKA TSÜNGREM TEMEIM

Kibubai kü dang ashi, oang, tetsür ka shibai tangar den meimteper aser nüktapangtatsür ka lir la meimang Kibubai parnok dang meim ama, nai la meimang. ~ Hosea 3:1

Ainkar Hosea par tendak 721 B.C mapang Tsüngrem sentokba nübur dang sayutsüngia liasü. Par nübur tai temenen atema pa kanga temulung raksaa jashia liasü. Yamaji Tsüngrem dak tamang mekatetba, tai temenen benshia atsüngzükjen atsüngzüka oaka, Tsüngremi teti parnok tsütsü aremzüka meima benshir ta sayutsü mechi Hosea dang pa toktsür nüktapangtaa japujaria senzüjen dang senzüba pa kibutsü Gomer maneni aremzüka bushia anir arur la meima anepalua agiang ta Tsüngremi ashiba angur. Koba tetezü, Yihova Tsüngremi item temulung madang pei Tsüngrem toktsür tamang yimsü nüktapangtaa senzüba pei nübur tsütsü aremzüka meima benshiba tatishitsü indang ibai drama ka yia sayuba lir.

Asen Tsüngrem ya asenok temenenpur tashi mait taküm den kodanga metoktepi aremzüka ataba tatasaba taochi yimlibilem agi sünga aliba Tsüngrem shibai pei chirtem teti pa temeim küpok lidaktsünür. Lee Ezell USA Servant Publication, osang nung yamai zülua sangtong. "Asen temeim kotaker tebu Tsüngrem tejak na nungi ano memeyipi atar" Adianutem, asen tai temenen ajak tatok agüja meshitettsür, pa chir küma lidaktsütsü pai asen tsütsü teti atasaa lir. Nentaka Tsüngrem temeim bushidi.

Temeim Tsüngrem, ni ne temeim nungi pilaa todaktsüma. Amen.

Uttar Pradesh nung putir ka den Khristan 30 tang tashi mechioker

March 02, 2024: Taküm Uttar Pradesh nung putir ka densema Khristan 30 shi apuba sülen tang tashi bail magütsüba agi jail balala nung maneni timtemdar.

State yimtiba, Lucknow nung Bishop Gerald John Mathias-i sangdong ka ajanga Khristantem dang Arogo nung putir Dominic Pinto densema puoka aliba Khristantem atema sarasademjang, ta mepishia metetdaksü.

Putir Dominic Pinto-i bail temepishiba agüja liasü saka court-i bail temepishiba ken o angadangtsü asoshi asemben tashi thimentsüogo.

Gerald John Mathias-i, bail temepishiba ken o angadangtsü atema maneni mapang atsülangba atema jashir, ta metetdaksü.

Uttar Pradesh nung Khristantemi anti-conversion ozüng alema inyakogo, ta tai tonglokja putir Pinto densema Khristan 39 apuba sülen jail nung ita ana abensaogo.

State nung Khristan lenirtemi, Khristan 39 rongnung parnok tenetbo bail nung chiokogo, saka tanüngba Khristantemji tang tashi jail nung timtemdar, ta metetdaksü.

Mathias-i, "Asenoki teimla

mesamali saka parnok bail nung chioktsü atema maneni sarasademtsüdi," ta metetdaksü.

Barabanki district nung Pinto densema Khristan 15-i Khristan yimsü dangi meyipdaksüba sentong ayongzüka agi, ta parnok nem tai tonglokja apu.

Khristantem jagi Uttar Pradesh Prohibition of Unlawful Conversion of Religion Act, 2021 ozüng alema inyakogo, ta tai tongloktsü.

Osangbener den jembidang Khristan lenir kati, Khristan 30 dak tema indang bail temepishiba ken otemji court balala nung benoka lir, ta metetdaksü.

Paisa, court nung item ken o angadangtsü atema mapang atsülangpet atsülanger, ta ashi.

Putir Pinto den Khristan 10 indang bail temepishiba March 1 nü angadangtsü liasü saka judge -i sodi agia lir ta shia March 7 tashi atsülangogo.

Lucknow Diocese nung chancellor aser otongdar, Donald D'Souza-i, "Tang agi tasembenbuba putir Pinto den tangartemi mepishiba bail ken o angadangtsü atsülanger. Court nung lawyer ana asüba agi anaben atsülanga liasü," ta metetdaksü.

**AO OSHI ANGAZÜKDAK:
TANÜ ANGAZÜKTSÜBA OJANG**



Tir Yimyim

Soratatsü

(adj) kodamasü nungdakba mapang achitsü ayuba (reserved food for contingency)

* Tsürabur kidang teti soratatsü yua alir.

Sorepdangrep

(v) senmanger melii kuma matemba (leave without heirs in a family)

* Tanü asüing kibong aika sorepdangrep kuma aoba angur.

OLONG PAITEP # 6715

1			2		3		4		5
6		7							
					8				
9				10					
							11		
			12						13
	14								15
					16				
			17						
								18	
19									

TIPIEN

- 2. Teburtemi tejak nung awaba - (8)
- 6. T ___ em - (3)
- 8. Tzüak ayudak - (3)
- 9. Nungdakba dang timba - (6)
- 11. Züjna ao - (4)
- 12. Yangi tzü angur - (5)
- 14. Tangar dang nungi tali - (4)
- 16. Senyong masü - (6)
- 17. Oadokdi - (3)
- 18. Tzü tarok - (3)
- 19. Yimtaklir aikati iba ya ki den külemi yanglusemer - (8)

LANGTSÜNGLEN

- 1. Temejangdak - (6)
- 3. Nisung ka mapa inyaksü nübo - (4)
- 4. Azüntsü asoshi mejemba - (6)
- 5. Tesangwa agütsüba - (5)
- 7. Tila masü - (4)
- 10. Tebenjem tetsür chanu - (4)
- 11. Tekolak nung inok - (4)
- 12. Tetsüngda - (6)
- 13. Tangar inyakba ka inyak - (6)
- 14. Tim masü ta ashi - (5)
- 15. Asalendong - (4)
- 16. Tanü dangtsü - (4)

OLONG PAITEP # 6714 TELANGZÜBA

TIPIEN :

- 1. Talang, 4. Ako, 6. Nükjidong,
- 7. Indang, 10. Anüshi,
- 14. Ashikülak, 16. Oya, 17. timtem

LANGTSÜNGLEN :

- 1. Tensa, 2. Lokti, 3. Nai, 4. Ango,
- 5. Osang, 8. Azü, 9. Amato,
- 11. Inlet, 12. Taküm, 13. Rasa,
- 15. kwi

NAI-A YA METETTER MA



February 29, 2024 nü United States nung North Carolina doctor Dr Kai Sun-i jala Chloe aso. Dr Sun ya kasa anogo- Leap Day nung aso aser laia taküm Leap Day nung jala ka sogo.

La ya Duke Health nung assistant professor aser rheumatologist inyaker. February 29, 2024 anepdang 5:12 ako nung Dr. Sun aser la kinungbo Michael Paik nati tanur tasembuba jala Chloe asoba atema benjungtepa liasü. Dr. Sun indang due date ji February 26 liasü saka anogo asem menur ang Baby Chloe aso.

MCTE nung anogo pezü nü 'Fusion Fest' liasü



Mokokchung, 2nd March (TYO): Yimyu ward, Mokokchung nung aliba Mokokchung College of Teacher Education-iyongzüka 'Fusion Fest' ta sür benjong ka 27th Feb nungi tenzüka 1st March, 2024 tashi anogo pezü nü "Navigating our Roots" omen dak rangloker kaogo.

Iba sentong nung Fazl Ali College nung tesayur Assistant Professor & Arju Centres Mokokchung nung Advisor, P. Tiatemsü tongti o jembir liasü. Sentong nung Dr. T. Alemla Longkumer, Principal, MCTE-ia shilem agia liasü. Kija, telok, kaketshir aser tesayurtemia iba benjong nung shilem agia liasü. Mokokchung

nung aliba riju balalatemisobaliba dak sentakba tetoktepa balala nung shilem agia liasü aser takokertem nem senpet sen agütsü. Iba sentong nung kentenmenü tapu balala den telok balalai stalls-tem lapoka chiyungtsü, osettsüset, photo booth, asaya tapu balala aser ano tangatem liasü.

Manipur nung Myanmar nunger refugee 600 jenoka lir

Imphal, November 26, 2023 (Agencies): Manipur kübok Myanmar den arrtsütepa aliba district tem nung Myanmar nunger 600 shi jenoka lir.

November 23, 2023 nungi Shan, Myanmarese (Burmese) aser Aungzangya o Momo Mongjang yimtsüngtem nungi Kuki nungertem teimba ser refugee tem aru.

Parnoki Kamjong district kübok Phaikoh, Huimin-Thana, Zoro aser Aloyo yimtsüngtem ajanga India telungi ait. Item

tesemtem nung Naga kintem teimba ser alir.

Manipur-i Myanmar den arrtsü nung tatembangba yimtsüng Phaikoh ya Kamjong District Headquarters nungi kilometre 33 shi pilar lir.

District administration-i refugee tem nungi biometric data aser tanga details bendener.

Myanmar nungertemji Kheirongren Camp nung anendakja lir. Central aser state sorkartemi tuyuba ama ketdangsürtemi

relief camps balala nung refugee tem indang biometrics bendener.

Kamjong district Deputy Commissioner Rang Peter, Additional SP Kamjong, Chief Medical Officer Kamjong aser Chassad Police Station Officer in Charge nunger Phaikoh yimtsüng nung mongzüker maparen inyaker.

Myanmar kübok Sagaing region aser Chin state nung kanga khatepba ajanga parnok nsusung 460 shi ka Manipur nung arua jenok.

Mkg. nung Computer sayudak Computer Education Centre (CEC) branch lapok



CEC Mokokchung Centre lapoker kelen centre lapoker, Ungma Baptist Arogo Pastor Takowati aser sentong nung adeneritem tangokba noksa.

Mokokchung, March/ Metsüremi 02 (TYO): Mokokchung nung tanü The Computer Education Centre (CEC) branch, ka "CEC Mokokchung Centre," ta sür computer tesayuba agütsüdak kongsang ka Toshikaba Ki, Opp. to Nayara Petrol Pump Sewak Gate, Mongsenbai Ward nung lapokogo.

Iba CEC Mokokchung Centre nungya ita 6 nung sen meyi trok(6000) agia Diploma in Computer Application (DCA) course agütsütsü asoshi computers 30 yua lir.

Tanu iba centre ya Ungma Baptist Arogo Pastor Takowati-i Tsüingrem tenung nung meshiteta sarasademer lapoktsüba den iba centre nung nüburtemi aika tanu putui nungtakba ama computer angazütsü aser ibaji ajanga

takum asoshi tajangzüker jenti ngutetsü nükla angurta iba centre tenungsanga ashi.

Iba centre ya Ungma nunger Zulumanen Jamir aser Shiluzenba Imsong nati lapok, centre lapoker ana den yaritepa BBA graduate Limatongzuk Jamir, aser civil engineering graduate Sakumeren parnoki computer tesayubaji agütsütsü.

Computer Education Centre (CEC) Head Office ya Silpukhuri, Guwahati-3, Kamrup, Assam aser tanu Mokokchung nung lapokba CEC Mokokchung Centre ya Nagaland nung mezüngbuba lapoker.

Proprietor Shiluzenba Imsong stated that the Diploma in Computer Application (DCA) course, which is a 6-month course, will start initially, with plans to introduce other courses later. He emphasized that the

training center is open to all enthusiastic learners and encouraged interested individuals to collect admission forms at the provided address or contact 8730887160 / 8730887310 during office hours. He informed that there will be two sessions: the morning session starting from 10:00 AM and the evening session from 2:00 PM.

Iba centre nungi ita 6 course Diploma in Computer Application (DCA) course, tangazükba aginertemi tsüngdong aruagi metetpelatsü akok aser ano nungtakbapurtemi 8730887160/8730887310 nung tongteprateptsü aser tesayuba tenzüker kelen anepdang 10:00 ako aser nikongdang 2:00 ako nungi tenzüka agitsüta achaayanger ajanga metetdaktü.

US-i Yemen nung Houthi telok indang missile raksatsü



Washington, Metsüremi/ March 2 (Agencies): US military-i Hokolbarnü sangdong ka ajanga ashiba agi, parnoki Yemen nung Houthi pur indang surface-to-air missile kar raksatsüogo.

Missile tem ya Yemen nung Houthi teloki azüoker aliba tesem nungi Temerem tziyim nung khaloktsütsü renemer liasü aser iba ya Temerem tziyim nung US indang tayimtsü atema lendong liasü, ta US Central Command-i ashi.

US Central Command-isa, Houthi puri anti-ship ballistic missile ka khaloktsü, ajisüaka iba ajanga kecha teraksatsüba madokdaksü mesüra rong ka danga meraksatsü.

"March 1 nü 12:40 pm (Sanaa time) shi nung U.S. Central Command (CENTCOM) force-i, Iran-i teyari agütsüba Houthi teloki Yemen nung parnoki azüoker aliba tesem nungi Temerem tziyim nung khaloktsütsü renemer aliba surface-to-air missile ka raksatsüogo. CENTCOM-i missile khaloktsütsü renema

aliba putet aser iba ya iba tesem nung US indang tayimtsü atema lendong ta asateta liasü," ta US Central Command-i X ajanga metetdaksü.

"10:46 pm (Sanaa time) nung Houthi teloki Yemen nungi Temerem tziyim nung anti-ship ballistic missile (ASBM) ka khaloktsü. Iba ajanga teraksatsüba kecha matalok, mesüra rong ka danga meraksa," ta kasa sangdong ajanga metetdaksü.

Iba tesem temeket nung tensa mejungi küma aoba mapang ka nung Houthi teloki November ita nungi tenzüka shishilembadang amshiba aser military rongtem maka arudar.

Mezüngbo parnoki Gaza nung Palestine nungterem pusama Israel den sendaktepa aliba rongtem maka liasü, ajisüaka Houthi teloki parnok inyakyim atsülangshia United Kingdom aser United States na den sendaka aliba rongtema amak tenzüka liasü.

Tawa US Central Command-i, Temerem tziyim nung US indang tayimtsü aser

coalition warship kati Houthi telok indang unmanned aerial vehicles (UAVs) pongu tashi raksatsüogo.

Taoba ita US nungterem den United Kingdom Armed Forces aser tanga linüktem senteper Yemen nung Houthi teloki azüoker aliba tesem 18 tashi maka liasü, ta metetdaksü.

US Central Command-isa, linük aika senteper iba jenjang agiba ya pei linük, partner aser iba tesem nung parnok den sendaktepa aliba linüktem tejangraba kümzüka ayutsü asoshi liasü.

Temerem tziyim nung tensa mejungi akümba ajanga shipping lines tongtibangtemi iba shishilembaba lenmang mamshi Africa meketa lenmang talangba agi tenzüko.

Lenmang melenshiba ajanga senotsü tali intoker aser ibajagi alima ajunga nung osset jenjang timba akümer aser kasa mapang nung Suez Canal amshiba agi foreign revenue ajanga Egypt sen aika aazüka aliba tajemba kümdaksüogo.

MENUNGRA BILEMTETTER



Late. Molodongba Ozükum
03 March 2021

Na iba lima toktsür küm asem süitema aruaka nü temeim aser mapa tajung onoki teti bilemteter. Na onok den taküm meliaka nü shisatsü tajung aser temeim onok den teti lir.

"Temeim kodanga tejen makümer" 1Korint 13

~ Ne den teti meimtepa aliba Kinungtsü, Jabasotem aser kinungertem.

Office of the Ungma Senso Mungdang AYIMOKTSÜR

Ungma Senso Mungdang Office ajanga yimyim ka yamai ayimoktsür. Wild Life and Protection act 1972, aser 85 buba Ungma Senso Mungdang luden pangzüng (Resolution) No. 6, 2023, dak ajemdaker, Ungma lika telongtet nung shingai Kartoos gun aser Air gun Riffle, shang (wire snare), ozü apuba (Trap) mozü mora amala amshitsü kenyongi memelar. Shibai temzüng anema aibelendir senji telatet maka alitsü ayimoktsür.

Ano Ungma lika nung pi bendanger süngben-tzüta, yata-inta senzütsü memelar. Aibelener pa/la dang temerenshi kasa alitsü. Iba temzüng ya March ita 1st 2024 anogo nungi benshia aotsü ayimoktsür.

Sd/-
L. Sutsung Longkumer, Tatar
President
Ungma Senso Mungdang

Sd/-
Temjenyapang Pongen, Tatar
Secretary
Ungma Senso Mungdang

Imran Khan-i tir menden atema Mahmood Khan Achakzai nominate asü

Islamabad, Metsüremi/ March 2 (Agencies): Imran Khan-i aniba party-i pusama Sunni Ittehad Council (SIC)-i Honibarnü Pashtun-khwa Milli Awami Party (PKMAP) tekolakba Mahmood Khan Achakzai Tir menden atema tokteptsü asoshi nominate süogo.

Arishi küm 75 tain Achakzai ya Asif Ali Zardari den tokteptsü, shiba Pakistan Muslim League-Nawaz (PML-N) aser Pakistan nung tang sorkar kümteter aliba party temi nominate süogo.

February 8 nü election agia party kati danga majority mongutetba sülen Pakistan Muslim League-Nawaz (PML-N) aser PPP nati longjemer sorkar kümtettsü atema telemtetba agi aser parnoki arishi küm 68 tain Zardari ta Tir candidate asütsü shimogo.

Tir election ya March 9 nü agitsü, ta Election Commission of Pakistan (ECP)-i metetdaksüogo.

Achakzai, shibai Balochistan nung Kila Abdullah-cum-Chaman kübok NA-266 constituency nungi National Assembly menden koka liasü, pa Imran Khan-i pusemogo, shiba tang Rawalpindi kübok Adiala jail nung puoka lir.

Iba hopta tetenzüklen Asad Qaiser-i anir PTI lenirtemi Achakzai aser Balochistan National Party (Mengal)



Imran Khan

tekolakba Akhtar Mengal na den ajurutepe, election inyakyim nung ochi mashi inyakyim sendaka aliba anema nokdaksü atema parnok pusemtsü mepeshia liasü.

Senden nung Achakzai-i, temzüng ozüng temaba jenjang nung toktsütsü aser Parliament tali tashi taitba kümdaksütsü atema inyakba political party tem pai pusemba lemsatepa liasü.

ECP sangdong ka ajanga ashiba agi, Tir election atema Zardari indang nomination paper Honibarnü benoktsü. Zardari ya taoba mapang 2008 küm September ita nungi 2013 küm tashi Tir liasü.

Dr. Arif Alvi, 2023 küm September 8 nü küm pongu term tembangba sülen taruba Tir election agitsü renema lir. Pakistan temzüng ozüng kübok Tir ya National Assembly, Senate aser provincial assembly pezü nungi züngsemtemi vote agüja shimmer.

GOVERNMENT OF NAGALAND
DIRECTORATE OF TECHNICAL EDUCATION
NAGALAND: KOHIMA

NO. DTE/ ESTT-2/02/2023-24/ /Dt. Kohima, the th March, 2024

NOTIFICATION

This is to inform all the intending candidates for Nagaland State Reserved seats in Para-medical, Agri & Allied (UG) degree courses for 2024-25 session, that the selection of candidates to fill up the State Reserved seats will be done through the merit of CUET with the subject (10+2) - Physics, Chemistry, Biology (PCB) & Mathematics (PCBM).

Candidate can apply for CUET(UG)-2024 through online mode: website <https://exams.nta.ac.in/> CUET-UG w.e.f. 27th February to 26th March 2024 up to 11:50 P.M.

(Er. VIPULHOU LHOUNGU)
Director.

Punjab National Bank						
Circle Sastra: Imphal Kwakeithel Thokchom Leikai						
E mail: cs946700@pnb.co.in						
SALE NOTICE FOR SALE OF IMMOVABLE PROPERTIES						
SCHEDULE OF THE SECURED ASSETS						
Sl. No.	Name of the Branch Name of the Account	Description of the Immovable Properties Mortgaged/ Owner's Name(mortgagors of property/ies)	A) Dt. Of Demand Notice u/s 13(2) of SARFESI ACT 2002 B) Outstanding Amount as per respective demand notice C) Possession Date u/s 13(4) of SARFESI ACT 2002 D) Nature of Possession Symbolic/Physical	A) Reserve Price (Rs. in Lakhs) B) EMD (last date of deposit of EMD) C) Bid Increase Amount	Date/ Time of E-Auction	Details of the encumbrances known to the secured creditors
1	Dimapur(045120) Kimala Ao, Borrower: Kimala Ao, H No.65,,PWD Colony,PO Dimapur-797112,Nagaland Guarantor:P Chuba Yaden, H No.65,,PWD Colony,PO Dimapur-797112,Nagaland	All the part and parcel of Property under Patta No.817,Dag No927,Mouza No.02,Block No.09 measuring an area of 5184 Sq ft which is bounded on the North by:PWD Road,South:Shri Yanger,East:Plot of Shri Rongsen Ao,,West:Land of PWD	A) 04.11.2022 B) Rs 29,64,368.00/- - further interest C) 03.03.2023 D) Symbolic	A) Rs.75.48 Lakhs B) Rs.7.54 Lakhs, 30.03.2023 C) Rs. 0.20 Lakhs	31.03.2024 From 01:00 PM to 04:00 PM	NIL
2	Dimapur Branch(045120) Window Media Borrower:Mereninla W/o Dr. Aoloshi,Darogapathat Village,Dimapur,Nagaland-797112 Gurantor and Mortgagor: Kimala Ao, H No.65,,PWD Colony,PO Dimapur-797112,Nagaland	All the part and parcel of Property under Patta No.817,Dag No927,Mouza No.02,Block No.09 measuring an area of 5184 Sq ft which is bounded on the North by:PWD Road,South:Shri Yanger,East:Plot of Shri Rongsen Ao,,West:Land of PWD	A) 21.12.2022 B) Rs.20,77,031.91/- - further interest C) 04.09.2023 D) Symbolic	A) Rs.75.48 Lakhs B) Rs.7.54 Lakhs 30.03.2023 C) Rs.0.20 Lakhs	31.03.2024 From 01:00 PM to 04:00 PM	NIL

ATP Acapulco Open: Casper Ruud final-i iogo



Casper Ruud

Metsüremi/March 2, 2024

(Agencies): Tang asaya aliba Mexican Open semifinal nung Casper Ruud-i 3-6, 6-3, 6-4 agi Holger Rune koka final-i iogo.

World No 7 nung aliba asayar Rune akokba sülen Ruud-i pa indang career nung tang agi terkabenbuba Top 10 aliba asaya ka kokogo.

Rune-i asaya kanga junga tenzüka pa mezüingbo tejakdang liasü, ajisüaka Ruud-i metoktsüi kanga meranga asaya tena maneni kasasa aküm. Asaya melentepyonga koka atuba sülen

Ruud-i kanga süngjemshir asaya aser temulungtetba tulu nung pai iba asaya ghonda ana ser minute 23 nung koka liasü.

Taoba mapang world No 2 asayar ya pa indang career nung tang mezüingbuba ATP 500 final kati iogo. Iba final atongba sülen pai tour-level event (ATP 250, ATP 500, ATP Masters 1000, ATP Finals aser Grand Slam) ajak nung final tongogo.

Pai pa indang career nung asayamung 10 koka lir aser item ajak ya ATP 250 level

nung takok anguba dang lir. Iba asayamung kokra Ruud asoshi pa indang career nung title tulutiba akokba asütsü.

Ruud aser Rune na tang tashi nung trokben asaya lir aser Ruud-i pongubenbo kokogo, ajisüaka tena tang mezüingbuba hard court nung asaya liasü.

Asaya nung Rune-i mezüing nungi asaya amokbanger asaya aser mezüingbuba set akokba sülen tanabuba set nunga 1-1 aliba mapang break points asem tashi nguteta liasü.

Tanabuba set nung tamakok nguaka tasembuba set nunga Rune tejakdang liasü. Pai Ruud indang serve ka break süa 3-1 agi tejakdang aküm aser iba sülen 4-2 agi tejakdang aküm.

Ajisüaka Rudd-i kanga meranga asaya aser ghonda ana ser minute metsür asem asayaba sülen pai tatembangbuba game pezü koka takok tulu angu.

Rudd final nung world no. 9 Alex de Minaur den asayatsü. De Minaur-i taoba küm iba asayamung koker lir.

Pant nem NCA-i March 5 temelaba agütsütsü: Ganguly


Metsüremi/March 2, 2024

(Agencies): Wicketkeeper-batsman Rishabh Pant mapang talangka masayai lir pa asayatsü temsüa kümogo ta National Cricket Academy (NCA)-i March 5 nü sangdongtsü lir, ta Sourav Ganguly-i metetdaksü.

Taoba India captain aser BCCI Tir Sourav Ganguly, shiba Delhi Capitals nung Director of Cricket lir pai iba osang ya TOI den sensaksemba mapang metetdaksü.

"Pa anema akümstü atema ajak inyakogo aser ibayongji NCA-i pa nem temelaba agütsütsü," ta taruba Indian Premier League (IPL) nung Delhi club ya Pant lenisüba nung asayatsü asü masü ta asüngdangba mapang Ganguly-i iba telangzüba agüja liasü.

"Rishabh tama March 5 nü temelaba agütsüdakjang aser



Sourav Ganguly

camp nung adentsü. Tangbo kecha shia matatetsü, saka asaya ka nung ka ta reprangdanga atadi," ta Ganguly-i ashi.

Pant gari tsükokba lendong ka nung densemba sülen küm ka dak tema masayai lir tang asaya tenzüksü lir. Iba lendong nung densemba sülen pa surgery aika agia liasü.

"Wicketkeeper dak sendakba nung Kumar Kushagra-a lir. Ricky Bhui-a season tepeyong kanga junga asayaogo. Ano Shai Hope aser Tristan Stubbs nata lir," ta Ganguly-i ashi.

IPL 2024 season March 22 nü nungi tenzüksü. BCCI-i mezüingbuba asaya 21 atema fixture yangluogo. Tanungba fixture ya sorkari general election agitsü sangdongba sülen BCCI-i telemtetba agitsü.

Saudi Arabia-i 2024 FIFA World Cup atema Bid asür

Metsüremi/March 2, 2024

(Agencies): Saudi Arabia-i 2024 World Cup atema Hokolbarnü formally bid süogo. Ita pezü tejakdang FIFA-i 2024 World Cup atema bid asürtem rongnung Saudi Arabia kija lir ta sangdongba sülen tang parnoki formally bid süogo.

Maneni kidanger Qatar nung Middle East nung mezüingbuba World Cup ayongzüka asayaba sülen küm ana sülen Saudi-ia bid süogo.

"Growing Together" yimyim dak ajemdaker Saudi Arabian Football Federation (SAFF)-i parnok indang bid logo, website aser Saudi Arabia nung football asaya indang film tatsüka sayaogo.

"Iba campaign ya Saudi Arabia nung nütsüing yongsük million 32 indang timla aser pongmang agi nongiter," ta SAFF bid unit tir, Hammad Albalawi-i ashi.

"Onok mapaji FIFA nem takokba tashi bid tajungtiba ka agüja linük nemadangdaksütsü aser alima ajunga nung onok pusemba Member Associations 130 dak temai onok dak tamang akaba ataloktsütsü asoshi lir," ta paisa shisem.

Crown Prince Mohammed bin Salman indang Vision 2030 reform agenda kübok linüki saisapong nung sen aika intokogo.

Bodhbarnü Saudi Arabia indang Public Investment Fund

(PIF)-i, tebur tennis asaya achaayangba lokti tentet ATP den "multi-year strategic partnership" ka yangluba sangdongogo.

2021 küm nungi PFI-i asaya tongtibangtem atema sen aika intokogo, kong LIV golf tour tenzüka aser English Premier League club Newcastle United alizükba densema lir.

Parnokisa Saudi Pro League nung club pezü alizüka lir aser itasen aika agüja Cristiano Ronaldo aser Neymar na densema nungtugu football asayartem aika atsüa aruogo.

Saudi Arabia-i mezüingbo Egypt aser Greece den külemi 2030 World Cup atema bid asütsü tejangraba liasü saka iba tebilemdangba ya June ita toktsüogo aser iba ajanga Spain, Portugal aser Morocco nunger nem lenmang lapoktsüogo.

Saudi Arabia-i 2024 küm World Cup ayongzüka asayatsü atema bid asütsü tebilemba aliba taoba küm October ita 4 nü sangdonga liasü.

Mapang ka nungbo Australia den külemi bid asütsü mesüra New Zealand, Malaysia aser Singapore nunger den külemi bid asütsü Indonesia-ia asadanga liasü, saka October 19 nü parnokisa Saudi Arabia pusemstü telemtetba agi.

Maneni Asian Football Confederation-i Saudi pusemstü telemtetba agiba sülen Australia-a atsüingina liasü.

Raina lenisüba nung India team Billie Jean King Cup asayatsü

New Delhi, Metsüremi/March 2

(Agencies): India tsür kija asayartem rongnung temaba jenjang nung alila Ankita Raina lenisüba nung India team taruba Billie Jean King Cup (Asia/Oceania Group I) nung asayatsü. Iba asayamung ya taruba ita China nung asayatsü renema lir.

Asayamung koba April 8 nungi 13 tashi asayatsü lir iba atema shimba India team nung Sahaja Yamalapalli, Rutuja Bhosale, Shrivalli Bhamidipaty, aser Prarthana Thombare

nungera densema lir.

All India Tennis Association-i Vaidehee Choudhary reserve player asütsü shimba sangdongogo. Iba team captain ya taoba mapang asayar Shalini Thakur Chawla asütsü.

Iba asayamung nung India den host China, Chinese Taipei, Pacific Oceania, aser Korea nungeria shilem agitsü. Team tem ajak iba international team tetoktepba nung tejakdangi atutsü atema nükjidong nung renemtepdar.

"Billie Jean King Cup Asia/Oceania Group I event nung India tenüing nungi asayatsü atema asayartem pelashishia sangdonger," ta AITA secretary-general-i ashi.

"Asayartemi temaba jenjang nung tokteptetsü ta onoki tamang akar," ta paisa shisem.

2023 küm Iba asayamung Tashkent, Uzbekistan nung asayaba mapang India team-i asaya pongu nung ana akok aser parnok team trok rongnungi pezübuba nung tembanga liasü.

Polio Drop Ana ajanga Polio madak maneni takok taküm lidakjang

India nung polio mali. Ajisüaka polio ya linük ishika nungbo lir aser meyipa arutsü akok. Ner tanurtem kümzüka tokjang. Polio vaccine ya mapangshia agüjang, ajita asünungdang polio tashidak madak India-i maneni takok angutsü.

To know more, please contact ASHA / ANM / Anganwadi Worker

MINISTRY OF HEALTH AND FAMILY WELFARE GOVERNMENT OF INDIA

Polio Day 3 March 2024 Sunday In all districts Ensure every child under 5 years of age gets polio drops everytime

UNICEF UNDP JSI

BILEMDANGANG
"Mapa medeni nükjidong kecha mataloktsü."